

Tazama, Amini na Uishi

Nanyi mnalindwa na nguvu za Mungu kwa njia ya imani hata mpate wokovu ulio tayari kufunuliwa wakati wa mwisho—1 Petro 1:5.

Wale ambao wanategemea haki yao wenyewe badala ya kutegemea haki ya Kristo watapoteza tuzo; watapimwa katika mizani ya patakatifu na kukutwa wamepungua. Hebu kila mtu anayefanya bidii ili kupata neema ya thamani ya uzima wa milele asiziamini nguvu zake mwenyewe, na, kwa maombi mengi, aielekeze nafsi yake isiyo na msaada kwa Kristo. Kuna uchunguzi mdogo sana wa Neno la Mungu kwa ajili ya mwelekeo wa uhakika katika njia ya uzima.

Idadi kubwa ya wale wanaodai kumwamini Yesu wana mawazo ya juujuu tu kuhusu kile kinachounda tabia ya Kikristo... Usijidanganye kwa wazo kwamba haki yako ya asili itakuleta katika upatano na Mungu. Usikose kujiona wewe ni mwenye dhambi mbele za Mungu. Usikose kumtazama Yesu aliyenuliwa juu ya msalaba; na unapomtazama, amini na uishi; kwa maana kwa imani katika dhabihu ya upatanisho mnaweza kuhesabiwa haki kwa njia ya ukombozi ulio katika Kristo Yesu. Amini kwamba umesamehewa, kwamba umehesabiwa haki, si katika uhalifu na uasi, bali kwa kutii mapenzi ya Mungu.

Ikiwa kwa imani unaishikilia haki ya Kristo, basi usijali mawazo yako, maneno yako, matendo yako. Jifunze sana, na omba kwamba kama Kristo amekuonesha njia, kwa neema Yake akulinde njiani. Kwa maana “tunalindwa na nguvu za Mungu kwa njia ya imani”; na hata imani haitokani na sisi wenyewe, bali pia ni kipawa cha Mungu.

Ili kukua katika neema na katika kumjua Yesu, ni muhimu kwamba utafakari zaidi juu ya mada za ukombozi. Unapaswa kujiuliza kwa nini Kristo amechukua ubinadamu juu Yake, kwa nini aliteseka msalabani, kwa nini alibeba dhambi za wanadamu, kwa nini alifanywa kuwa dhambi na haki kwa ajili yetu. Unapaswa kujifunza ili kujua kwa nini Alipaa mbinguni katika asili ya mwanadamu, na kazi Yake kwetu leo ni ipi....

Ikiwa mawazo ya Yesu, kazi na tabia Yake, yakithaminiwa, utaongozwa kuzama katika kina cha ukweli, na utawezeshwa kumiliki vito vya thamani vya ukweli. Kwa kuithamini tabia ya Kristo, kupitia mjumuiko na Mungu, utaichukia dhambi. Unapotafakari mambo ya mbinguni, na kutembea na Mungu, kama alivyofanya Henoko, utaweka kando kila mzigo mzito, na dhambi ile ikuzingayo kwa upesi; nawe kwa Saburi utapiga mbio katika yale mashindano yaliyowekwa mbele yako.... Lazima jengo letu lijengwe juu ya Mwamba Kristo Yesu la sivyo halitastahimili majaribu ya tufani (*The Signs of the Times*, Desemba 1, 1890).